

John Christopher DG. Lúbag
Lesson 1 – Scene

Exercise: Write a scene.

Tagpuan: Sa loob ng bahay nina Edison.

Mapapansin ni Edison na malalim ang pagtitig ng kaibigan niyang si Luna sa naka-display nilang family picture na nakasabit sa dingding. Lalapitan niya ito at kakausapin.

Edison: [mauupo siya sa tabi ni Luna na nakaupo sa sofa] Ano'ng tinitingnan mo?

Luna: [babáling siya ng tingin kay Edison] A, wala. Natutuwa lang ako sa family picture n'yo.

Edison: Ha? Bakit naman? E, ordinaryong family picture lang naman 'yan.

Hindi na kikibo si Luna at mababakas sa kaniyang mukha ang pagpunit ng kalungkutan.

Edison: Teka, maiba nga tayo, ano nga paláng sadya mo?

Luna: A, 'yon. [agad niyang bubuksan ang daláng bag] Manghihiram sana ulit ako ng libro. Tapós ko na kasi itong hulíng ipinahiram mo.

Edison: Iyon lang ba? Sige. Ano bang preferred mo ngayon?

Luna: [iaabot niya kay Edison ang librong kinuha mula sa bag] Salamat. Ikaw nang bahala. Alam mo naman kung ano ang magandang basahin.

Edison: O, siya, sige. Kung 'yan ang gusto mo. Teka, nagugutom ka ba? O bakâ gusto mo ng maiinom.

Luna: Hindi na. H'wag ka nang mag-abala. Hindi pa naman ako gutom. Sa katunayan niyan, gusto ko lang talaga ng makakausap.

Edison: Bakit? May problema ba?

Luna: Hindi. Wala naman.

Edison: Alam naman nating pareho na puwede mo namang ibalik sa akin itong libro búkas. At sakâ kung manghihiram ka lang ng libro, puwede mo naman akong i-text na lang.

Luna: [panandalian siyang hindi kikibo at pílit itatago kay Edison ang pinipigilang mga luha] Ano kasi, gusto ko lang kasing umalis sa bahay kahit sandali lang. Para makahinga ba. Alam mo 'yon.

Edison: May nangyari ba? Sabihin mo na sa 'kin. Mapagkakatiwalaan mo naman ako sa mga bagay na ganiyan. Makikinig ako.

Luna: [titingnan niya si Edison bago magsalita] Ano kasi, kanina, pagkauwi natin, dinatnan ko na namang nag-aaway si Nanay at si Tatay. [bahagya siyang hihinto sa pagsasalita] Matagal na silang

hindi nagkikibuan. Kanina na lang ulit. Tápos ganoon pa. Hindi ko alam ang dahilan ng hindi nila pagkikibuan. Basta ang alam ko lang, nahúli ni Nanay si Tatay dati na may kasamang iba.

Edison: [mananatili siyang tahimik sa pakikinig]

Luna: [yuyuko siya at iiling] Nakakahiya.

Edison: [ipapatong niya ang kamay niya sa balikat ni Luna] Ano ka ba. Ba't ka mahihiya? Hindi naman ikaw ang pumili niyan. At sakâ isa pa, lahat naman yata ng mga magulang ay dumaraan sa ganiyan. Lahat nag-aaway. Kahit si Mami at Dadi, e, madalas mag-away dati. 'Yon nga lang, may kani-kaniya nga lang talagang pinag-aawayan. Magkakaiba ang bigat, kumbaga.

Luna: [titingnan niya ulit si Edison na makikita niyang nakangiti sa kaniya; bahagyang tataas ang kaniyang boses sa pagsasalita] Pero iba ito. Sinaktan ni Tatay si Nanay. Sa harap ko! [panandalian siyang matitigilan sa pagsasalita habang pinupunasan ang hindi na napigilang pagbuhos ng mga luha]

Luna: [magpapatúloy siya sa pagsasalita habang walang-imik na nakikinig si Edison] Bago ako umalis sa bahay kanina, narinig kong pinapalayas na ni Nanay si Tatay.

Edison: Saan naman pupunta ngayon ang Tatay mo?

Luna: Hindi ko alam. Bakâ sumama na siya ro'n sa iba niya.

Edison: Sa babae niya?

Luna: [hindi siya kikibo at patuloy lámang na hihikbi] Hindi—hindi babae, Ed. Lalaki. Lalaki ang kasama ni Tatay nang nahúli siya ni Nanay.

Edison: [pipinta sa mukha niya ang lubos na pagkagulat; at wala siyang ibang gagawin kundi ang manahimik, kasabay ng pagkuha niya sa kamay ni Luna]

Luna: Wala ka man lang bang sasabihin?

Edison: [pupunasan niya ang luha sa mga mata ni Luna gámit ang kaniyang kamay] Wala naman ako sa posisyon para magkomento tungkol diyan. Nandito lang ako para makinig.

Luna: [sandali niyang yayakapin si Edison] Salamat, Ed. Salamat sa pakikinig.

Edison: [ngingiti siya] Hayaan mo. Darating ang panahon na ang lahat ng ito ay babalikan mo. At nakasisiguro ako na wala nang batang ikaw na muling magkukuwento ng mga ikinuwento mo.

Luna: [bahagya siyang mapapangiti kay Edison at waring pupunasan ang tuyo nang mga luha]

Edison: At dahil diyan, parang alam ko na yata kung ano'ng libro ang ipahihiram ko sa 'yo.

Luna: Ano?

Edison: Koleksiyon ng mga tula ni Allan Popa. Magaganda 'yong mga tula niya ro'n. At sakâ may isa siyang tula ro'n na gustong-gusto ko. Magugustuhan mo rin 'yon, panigurado.

Luna: Ano'ng title?

Edison: "Ang Lahat ng Daan ay Daang Pauwi."

End of the Scene